

Nalinginnaasumik nassuiaatit

Siunnersuummut tunuliaqutaasut:

Inuutissarsiutitigut ilinniagaqarnermut sulisitsisut akiliutaat pillugit Inatsisartut inatsisaata allangortinneqarnissaanut Inatsisartut inatsisissaattut siunnersuut Inatsisartut ukiakkut 2003-mi ataatsimiinnissaannut Naalakkersuisut oqaluuserisassangortinniarlugu nalunaarutigaat.

Inuutissarsiutitigut ilinniagaqarnermut sulisitsisut akiliutaat pillugit Inatsisartut inatsisaata allangortinneqarnissaanut siunnersuut Inatsisartut akuersissutigissappassuk inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaanni kingunerisassanut iluarsissutissat uani eqqartorneqartut iluarsissutigineqassapput, taamaangippat inatsisit taakku marluk imminnut akerleriilissammata.

Tamatumunnga tunuliaqutaavoq § 36, imm. 1-imi atuuttumi innersuussutigineqarmata sungiusarluni suliffimmiinnerit, inuutissarsiutitigut ilinniagaqarnermut sulisitsisut akiliutaat pillugit Inatsisartut inatsisaanni ilaasut aamma § 36, imm. 2-mi innersuussutigineqarmata ilinniarfimmiinnerit Inatsisartut inatsisaanni tassani ilaasut.

Inuutissarsiutitigut ilinniagaqarnermut sulisitsisut akiliutaat pillugit Inatsisartut inatsisaannut allanguutissatut siunnersuutip akuersissutigineqarneratigut sulisitsisut suliffimmi sungiusarnernut ilinniarfimmiinnernullu aalajangersimasunut akiliuteqartarunnaassapput. Sulisitsisut akiliutaat sulisitsisunut ilinniartunik sulisoqalersunut akiliutigineqartassapput ilinniarnullu ingerlanera tamakkerlugu suliffimmi sungiusarnermi ilinniarfimmiinnermilu agguataarneqarsimassallutik.

Aammattaaq innersuussutigineqassaaq Inuutissarsiutitigut ilinniagaqarnermut sulisitsisut akiliutaat pillugit Inatsisartut inatsisissaata allangortinneqarneranik inatsisissatut siunnersuut nassuiaatitalik.

Aningaasatigut allaffissornikkullu kingunerisassat:

Siunnersuutip akuersissutigineqarnera aningaasatigut allaffissornikkullu kinguneqassangilaq.

Tusarniaaneq:

Siunnersuut piffissami 2002-mi 1. julimiit 1. augustimut ukununnga tusarniaassutigineqarsimavoq: qitiusumik ilinniarfiit, qitiusumik ilinniartitaanernut ataatsimiititaliat, najukkani inuussutissarsiutitigut ilinniarfiit, najukkani inuussutissarsiutitigut ilinniartitaanernut ataatsimiititaliat, Kalaallit Nunaanni ilinniarfiit, sulinermik sungiusarnermut ilitsersuisut, KANUKOKA, ilinniagaqartut kattuffii (KIK aamma DKIK), KIIP-ip Danmarkimi allaffimmi immikkoortortaa, Namminersornerullutik Oqartussat pisortaqarfii, Kalaallit Nunaanni Sulisitsisut Peqatigiiffiat, Kalaallit Nunaanni Niuernermut, Assartuineranut Suliffissuaqarnermullu Sulisitsisut Kattuffiat (HST) aammalu SIK.

KANUKOKA-mit Namminersornerullutik Oqartussani pisortaqarfinit, Naalackersuisut Allattoqarfianni Inuussutissarsioreranut immikkoortortaq aamma Isumaginninnermut Suliffeqarnermullu Pisortaqarfik kisiisa pinnagit, Sulisitsisut Peqatigiiffiannit HST-millu tusarniaanermut akissutit tiguneqarput.

Tusarniaanermi akissutit oqaaseqaatillu tiguneqartut siunnersuutip nassuiaatitaasalu allanngorneqarnissaanut tunngavissiinngillat. Tusarniaanermi oqaaseqaatit pingaarnerit naatsumik nassuiaatigineqassapput.

KANUKOKA-p oqaatigaa sulisitsisut aningaasartuutaat nikisinneqassanngippata akiliutit ilinniartitaanernut ataasiakkaanut atatillugu assigiinngitsuussasut. Inuutissarsiutitigut ilinniagaqarnermut sulisitsisut akiliutaasa agguataarnerat ilinniartitaanernut ataasiakkaanut naleqqussarneqassapput, agguaqatigiissitsilluni naatsorsuineq malillugu agguarneqarnatik.

Aammattaq KANUKOKA-p oqaatigaa aqqissuussineq ilinniartitaanernut tamanut assigiimmik atuutissasoq, tassa imaappoq aammattaq isumaginninnermi peqqissaanermilu ikiortitit ilinniartitaaneq ilaatinneqassasoq.

Kiisalu KANUKOKA-p aamma oqaatigaa ilinniartitaanernut taakkununnga atatillugu aningaasat ilinniagaqarnerisutitut kontumut nuunneqartussat sungiusarluni sulineranut akissarsianut attuumassuteqartinneqassasut.

Tamatuma saniatigut KANUKOKA-p oqaatigaa akiliutit ilinniartut piffissamut atorfeqarfigisaannut atatillugu naatsorsorneqartariaqartut, siunnersuummi oqaatigineqartutut piffissami tunniunneqarfissaanni atorfinitsinneqarnermut atatinnagu.

Kiisalu KANUKOKA-p oqaatigaa Naalackersuisut tapiissutit qaammammut kingumoortumik tunniunneqartarnissaannik aammalu ilinniartoq qaammatip ulluisa 20-anni atorfinitsinneqan-ngippat tapiissutit tunniunneqarsinnaannginnerannik naatsorsuutiginninnerat isumaqatigisinnaanagu.

Naalackersuisut KANUKOKA-p oqaaseqaatai Kalaallit Nunaanni Sulisitsisut Peqatigiiffiat KANUKOKA-lu peqatigalugit oqaluuserisimavaat, tamannalu tunngavigalugu siunnersuummik allannguinissamik pissutissaqarsimanatik.

Aammattaaq siunnersuut Inatsisileriffimmi inatsisitigut aaqqissugaanera pillugu misissorneqarsimavoq. Tassanngaannit oqaaseqaatit siunnersuummi ilanngunneqarput, tassunga ilanngullugit siunnersuummi erseqqissaatit nassuiaatillu.

Aalajangersakkanut ataasiakkaanut nassuiaatit

§ 1-mut

Aalajangersakkamut aallaaviuvoq illuatungeriit isumaqatigiissuteqarsimanerat. Kalaallit Nunaanni Sulisitsisut Peqatigiiffiata SIK-llu akornanni kiisalu Naalakkersuisut SIK-llu akornanni inuussutissarsiutinut tunngaviummik ilinniarfinni ilinniartut pillugit isumaqatigiissuteqartoqarpoq. Sulisitsisut namminersortut Kalaallit Nunaanni Sulisitsisut Peqatigiiffiannut ilaasortaan-ngitsut massakkorpiaq isumaqatigiissuteqanngillat. Ilinniartut sulisitsisuni isumaqatigiissuteqanngitsuni atorfeqartut isumannaallisaaviginiarlugit aalajangersakkamik ikkussisoqarpoq, tassanilu aalajangersaavigineqarluni ilinniartut pisortani ilinniartut akissarsiarisartagaasa atorfeqarnerminnilu atugassarisaasa minnerpaamik assinginik akissarsiaqartitaanissamut pisinnaatitaaffeqartut. Inuussutissarsiutinik ilinniartitaanermi ilinniartut ilinniagaqarneriutit pillugit malittarisassat naapertorlugit immikkut tunniunneqartartunik ilinniarnertik naallugu pisinnaatitaaffeqassapput.

Inuussutissarsiutinik ilinniartitaanerit tamaasa aalajangersakkap atuuffissarai.

§ 2-mut

Inuutissarsiutinik ilinniagaqarnermut sulisitsisut akiliutaat pillugit Inatsisartut inatsisaannut allannguutissatut Inatsisartut inatsisissaattut siunnersuut peqatigalugu Inatsisartut peqqussutissaat atuutilissaaq, aammalu sanaartornerup, inuussutissalerinerup, saviminilerinerup aammalu niuernerup allaffissornerullu iluanni inuussutissarsiutinik tunngaviummik ilinniartitaanernut 1. januar 2004-mit atuutissalluni. Isumaginninnermi ikiortitit peqqissaanermilu ikiortitit ilinniartitaanerit iluanni ikaarsaariarnermi aalajangersakkamik ilanngussinissaq pisariaqartinneqarpoq, ilinniartitaanerit taakku iluarsartuunneqaqqinnerannut atatillugu ilinniartitaanernut taakkununga brancheudvalgit ilinniartitaanerup ingerlanerani tamarmi ilinniagaqarnermut tapiissuteqartitsilernissaq kissaatigisimammassuk. Taamatut allannguineq aningaasartuutinik nikisitsissanngippat tamatumani pisariaqartinneqartut tassaapput

- inuutissarsiutinik ilinniagaqarnermut sulisitsisut akiliutaat pillugu Inatsisartut inatsisaat naapertorlugu akiliutinik ilinniartitaanerni taakkunani ukiumi siullermi ilinniartunut tapiissutinut suli aningaasalersuissutigineqassasut,

- Peqqinnissamut Pisortaqarfiup peqqissaanermi ikiortinngorniarlutik ilinniartut sulinermik sungiusarneranni akissarsiaannut aningaasat atukkani ilinniagaqarnersiutinut kontunut nuussagai, aamma

- kommuninut ataatsimoortumik tapiissutit annikillisinneqassasut ilinniartitaanerni taakkunani ilinniartut akissarsiaannut kommunit aningaasartuutaasa amerlaqataannik, aningaasallu taakku ilinniagaqarnersiutinut kontunut nuunneqassasut.

Inatsisartut inatsisaata isumaginninnermi peqqissaanermilu ikiortitit ilinniartunut 1. januar 2004-mi atuutilersinnaanissaa naatsorsuutigineqarpoq. Inatsisissaq akuerineqarpat kommuninut 2004-mut ataatsimoortumik tapiissutissat isumaqatigiissutigineqareersimassammata kommuuninut ataatsimoortumik tapiissutit kingumoortumik iluarsivigineqarsinnaassapput.